

## Dithero tsa Tirelano mo Kutlwanong

19/2015 Thero ka Sontaga o o bidiwang Judika, e le ka 22. 02. 2015

Mo leineng la Modimo o e leng Rara le Morwa + le Mowa o o Boitshepo!

Lefoko le le okamelang beke eno, le kwadilwe mo go Math. 20:28, le re: **"Fela jaaka Morwa-Motho a sa tla go direlwa, mme e le go direla le go neela botshelo jwa gagwe losong go nna kgololo ya ba bantsi."**

1. Sefela sa 216 - 201/209

2. Thapelo: "Nkatlhole, Modimo, o nkemele mo tshekong ya me le batho ba ba se nang lorato, o nkgolole mo bathong ba tsietso le ba tshiamololo. Gonne ke wena Modimo wa botshabelo jwa me. Mme o ntatlhetseng? Ke ka ntlhaang, fa ke tsamaya ke hutsafetse ka go bogisiwa ke mmaba? Romela lesedi la gago le boammaaruri jwa gago; a di nkoge, di nkise kwa thabeng ya gago e e boitshepo le kwa maagong a gago gore ke fitlhe kwa aletareng ya Modimo, kwa Modimong wa boitumelo jwa me jo bo ntuduedisang." Pes. 43:1-4.

3. Lefoko la Testamente e kgologolo le kwadilwe mo go Gen. 22:1-13;

Epistolo ka fa thulaganyong ya 2 e kwadilwe mo go Bahebere 5:7-9;

Efangele ka fa thulaganyong ya 5 e kwadilwe mo go Johane 11:47-53.

4. A go ipolelwe tumelo ya bokeresete!

5. Sefela sa 92 - 85/88

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Mareko 10:35-45, e re: "Jaanong ga tla go ene Jakobo le Johane, bomorwa Sebeteo, ba mo raya ba re: 'Moruti, re rata gore o re direle se re tla se go kopang.' A ba botsa a re: 'Lo rata ka lo direla eng?' Ba mo araba ba re: 'Re nee gore re tle re nne, mongwe ka fa letsogong le le jang la gago, yo mongwe ka fa go la molema, mo kgalalelong ya gago.' Jesu a ba fetola a re: 'Ga lo itse se lo se kopang. A lo nonofile go nwa senwelo se ke yang go se nwa, gongwe go kolobediwa ka kolobetso e ke yang go kolobediwa ka yona?' Ba mo araba ba re: 'Re nonofile.' Mme Jesu a ba raya a re: 'Senwelo se ke se nwang lo tla se nwa, le kolobetso e ke kolobediwang ka yona lo tla kolobediwa ka yona.' Mme go nna ka fa letsogong le le jang la me le ka fa go la molema ga se ga me go go naya, go tla newa bone ba ba go baakanyeditsweng. Ya re ba ba lesome ba utlwa, ba simolola go ngongoregela Jakobo le Johane. Jesu a ba ipiletsa, a ba raya a re: 'Lo itse gore ba ba kaiwang balaodi ba merafe, ba e busa ka thata, le bagolo ba yona ba e laola. Mme go se ka ga nna jalo mo go lona; yo o ratang go

nna mogolo mo go lona, a a nne modiredi wa lona; le gona, yo o ratang go nna wa kwa pele mo go lona, a a nne motlhanka wa botlhe. Gonne le ene Morwa-Motho ga a tla go direlwa, mme o tsile go direla le go ntsha botshelo jwa gagwe go nna segololo sa ba bantsi." Amen.

**8. Thero:** Phuthego e ntle mo Moreneng wa rona Jesu Keresete, Sontaga wa kajeno o bidiwa Judika. Ke gore "nkathole!" Ke nnete Modimo ke Moathodi yo mogolo. Seka kgang ya me Morena! A re tlhaloganya ditiragalo tsa dipogo tsa ga Jesu? A re tlhaloganya tiragalo ya loso lwa ga Jesu? Barutwa ba ne ba sa di tlhaloganye, ba sa di utlwe sentle, mme gape di ne di le bokete mo pelong ya ga Jesu, ka barutwa ba ne ba solofela se sengwe. Go ntse fela jalo le kajeno. Dipelo tsa ba bantsi di thatafetse fela.

Go bonala jalo. Jakobe le Johane ba atamela mo Moreneng, ba kopa sengwe mo go ene. Jesu a ba botsa, a re: "'Lo rata ka lo direla eng?' Ba mo araba ba re: 'Re nee gore re tle re nne, mongwe ka fa letsogong le le jang la gago, yo mongwe ka fa go la molema, mo kgalalelong ya gago.'" A re tlhokomeleng, bakaulengwe ba me, gore Matheo a bolela gore barutwa ba le babedi bao ba ne ba kopelwe ke mmaabo, ya re ba le mo tseleng ya go ya kwa Jerusalema, a ba kopela gore Morena Jesu a ba nnise fa thoko ya gagwe mo kgalalelong ya gagwe. Jesu Keresete, Morena wa rona, o ne a latlha kopo ya ga Jakobe, le Johane, madodana ka Sebedeo, le ya ga mmaabo, a ba raya a re: "Ga lo itse se lo se kopang." Dikopo tsa rona ga di latlhwe, fa re tla kopa se re tla palelwang ke sona go se sikara, mmogo le maikaelelo a sona. Re ka ipolela, fa re utlwa gore re tla kgona go dirafatsa se le se. Go botlhofo go ipolela ka molomo wa ba ba sa tlhaloganyeng puso ya ga Jesu gore ke eng, gape ba sa itse kgalalelo ya yona. Ba ne ba ipatlela sengwe, ba sa kgathalele barutwa ba bangwe. Jesu a ba botsa, a re: "A lo nonofile go nwa senwelo se ke yang go se nwa, gongwe go kolobediwa ka kolobetso e ke yang go kolobediwa ka yona?" Jesu o ne a raya dipogo tse di boitshegang tse a neng a ya go di boga kwa Jerusalema, re ka di tshwantsha le se se babang mo go maswe. Bagaetsho mo Moreneng, motho o ka botsa gore senwelo le kolobetso di rayang fano? Mafoko a le mabedi ao a tlhalosa dipogo tsa ga Keresete. Gape Jesu a bolelela pele, fa barutwa ba gagwe, le bone ba tla boga ka ntlha ya gagwe, e nne baswelatumelo. Go ne go sa fete sebaka se seleelele go ya go diragale gore go nne teng ba ba neng ba swa ka ntlha ya Keresete. Jakobe a nwa senwelo sa tlalelo e kgolo, fa a ne a bolawa ke Herote, jaaka go kwadilwe mo Dit. 12:2. Ke fa ga dirafadiwa mafoko a ga Jesu. Gape re utlwa ka ga Johane mo Tshen. 1:9 gore Johane o tlhakanetse le badumedi ba bangwe pitlagano le puso le boitshoko mo go Jesu, o ne a le mo setlhakatlhakeng se se bidiwang Patemose ka ntlha ya Lefoko la Modimo le ka ntlha ya go supa ka ga Jesu. Re tshwanetse go ikokobeletsa thato ya Modimo, go ya re tla abelwa tse re di baakanyeditsweng ke Modimo.

Phuthego ya Morena wa rona Jesu Keresete, tswelelo-pele ga e dirise tshiamo ya Modimo. Barutwa ba ne ba galefela boJakobe le Johane. Ka go dira jalo le bone ba supa gore ba ne ba sa itse se ba se dirang. Boleo jwa go ikgodisa bo tlhagisa mafufegelo le kilano. Gape go fela mowa wa go utlwana le go ratana mo bathong. Go ntse jalo le kajeno, ba ba ikgodisang ga re ba rate, re a ba tlhowa. Go molemo go ikokobetsa, e seng go ikgodisa. A re ikokobeletseng thato ya Modimo ka metlha! Kana Modimo ke o o tla godisaang ba ba ikokobeletsang thato ya ona. Ke nnete, Jesu o ne a ikokobetsa, a utlwa Rraagwe go ya mo losong, e le loso lwa sefapaano. Mo bofelong Modimo wa mo godisa thata, wa mo naya leina le le godimo ga maina otlhe. A re se ka ra tsenngwa ke mowa wa lefatshe, e le mowa o o tsenang ka pele mo diphuthegong, bogolo mo sebakeng sa kajeno a o se nne fa gare ga rona, gonne re ba ba rekolotsweng ke Keresete ka madi a gagwe a a boitshepo mo sefapaanong. Mo go ba ga Keresete go bonala gore yo e leng yo mogolo ke Motlhanka wa rona rotlhe. Yo o direlang ke yo mogolo bogolo go ene yo a mo direlang. A re lemogeng le se sengwe! Yo o ikgodisang o leofela kemo ya gagwe mo phuthegong ya ga Keresete, gonne Modimo o emalalana le botlhe ba ba ntseng jalo, gonne Modimo o emalalana le ba ba ikgogomosang, mme o abela ba ba ikokobetsang bopelotlhomogi. A re tlhokomeleng tse di kwadilweng mo go 1 Petr. 5:5-6 tse di reng: "Lotlhe direlanang ka boikokobetso; gonne 'Modimo o ganetsa ba ba ikgogomosang, mme ba ba ikokobetsang o ba naya boitshwarelo.' Ka moo ikokobeletseng lesogo le le thata la Modimo gore o tle o lo godise ka nako e e leng yona."

Phuthego e ntle, a re tlhokomeleng le tiro ya ga Jesu! Ke go direla. Seo se supa tlhago ya go tla ga gagwe mo lefatsheng, a re: "Ga a tla mo lefatsheng go bitsa basiami, mme e le go bitsa baleofi." "Morwa-Motho ga a tla go direlwa, mme e le go direla le go neela botshelo jwa gagwe losong go nna kgololo ya ba bantsi," e le Modisa yo o molemo yo o beelang botshelo jwa gagwe ka ntlha ya dinku tsa gagwe a re: "Ga go ope yo o nkamogang botshelo jwa me, ke na ke bo neelang ka bogame." Loso la ga Jesu ke tefelo ya molato wa ba bantsi gore e nne ba gagwe, jaaka go kwadilwe mo go 1 Joh. 2:2 gore "Ene yoo ke thuanyo ya maleo a rona, mme e seng ya maleo a rona fela, mme e bile ke ya maleo a letatshe lotlhe." Jesu o tlile mo lefatsheng go dirafatsa tsholofetso e e reng: O tla swela batho botlhe ba dipaka tsotlhe ba merafe yotlhe. Loso lwa gagwe re lo tlhalosediswa ka mafoko a a kwadilweng mo go Isaya 53:11, a a reng: "Motlhanka wa me yo o siameng o tla siamisa ba bantsi ka kitso ya go mo itse, mme melato ya bone ene o tla e rwala." Jesu o ineetse mo losong gore e nne Moruanyi wa batho botlhe, a ba rekolole ka loso lwa gagwe, gore botlhe ba nne ba gagwe. Jesu o tlile go dirafatsa tiro ya Motlhanka wa Modimo yo o solofeditsweng mo go Isaya 52,13-15; 53:1-12. Ga diragala! "Ruri ene o rwele malwetse a rona, a sikara matlhoko a rona; ... o phololelitswe ka ntlha ya maleo a rona, a teketelwa melato ya rona. Petso ya mo wela gore rona re bone kagiso. Mme re fodisitswe ka dintho tsa gagwe." Ka mafoko ao Mopholosi wa rona o konkonya mo dipelong tsa rona gore re mo amogele, re dumele

mo go ene, re mo ikanye ka pelo yotlhe le tse re di baakanyeditsweng ke ene gore re itshwarelwe dibe tsotlhe tsa rona, le go amogelwa mo botshelong jo bo sa khutleng. Ke tse re di baakanyeditsweng ka go direlwa ke ene, e le yo o ipofileng ka lefoko la gagwe la tsholofetso ya gore mo kolobetsong re itshwarelwa maleo, le go abelwa pholoso e e sa feleng, le mo boipobolong re itshwarelwa maleo mo leineng la Modimo o e leng Rara le Morwa le Mowa o o Boitshepo, le mo selalelong sa gagwe re abelwa mmele wa gagwe, le madi a gagwe a re a tshologeletsweng go nna boitshwarelo jwa dibe. O rata thata gore re tlwaele go atamela go atamela mo aletareng ya gagwe gore re amogele dikabelo tsotlhe tseo.

Ga go na tsela e nngwe e e ratwang ke Mopholosi wa rona, fa e se go direlwa ke ene. Mo botshelong jotlhe jwa gagwe o ineetse maikaelelong a gagwe a go thusa batho botlhe. Jesu a bua mafoko ao a le mo tseleng ya go ya kwa Jerusalema. A re ikaeleleng go tsena mo losong lwa gagwe lo lo re agang. A ineela batho gore a ba golole mo merwalong e ba e rweleng le mo maipofong a ba bofilweng ka ona. Ke ka ntlye ya moo, fa a ne a re direla, a tsholola madi a gagwe mo losong. Jesu a re beela botshelo jwa gagwe gore e nne kgololo ya ba le bantsi, a swa e le Moruanyi, e le sengwe se rona re sa ka keng re se dirafatsa. Ga go na motho yo o ka nnang moruanyi wa ga morwa rraagwe. Amen.

**9. Thapelo:** "O obegetseng, mowa wa me, o huduegelang mo teng ga me? Solofela mo Modimong; gonne ke tla ba ke o leboga ka e le ona thuso ya sefatlhego sa me le Modimo wa me." Pes. 43:5. Amen. Thapelo ya Morena: Rara wa rona ...

#### 10. Sefela sa 90 - 83/96

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. Mkhabela, ka ngwaga wa 2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.